

Ang Banagbanag

Ang Mantalaan sa Presensya ni Kristo

The Dawn in the Cebuano dialect

“Ang Tanang Mata Makakita Kaniya”	3
Ang Pagdasig Gihatag Pinaagi Sa Pag-ampo	15
Ang Usa Ka Komunidad Nipasaylo.....	17
Mga Mahalong Butang Nga Gisulod Sa Kolon	19
Usa Ka Paghangyo Sa Pagpakig-uli	21
Ang Komunidad Nga Nanag-ambitay Sa Ilang Kabtangan	23

“Ang Tanang Mata Makakita Kaniya”

“Tan-awa, siya umalabut uban sa mga panganud ug makita siya sa tanang mata, sa tanang nanagdughang kaniya; ug ang tanang kabanayan sa yuta managminatay tungod kaniya.” Ang topiko sa ikaduhang pagbalik ni Hesus maoy usa nga nakapahatag ug interes sa mga nagasulti nga Kristyanos sukad si Hesus propesiyanhong namulong mahitungod niini hapit modulo sa duha na kalibo katuig karon. Daghanang mga teoriya ang namugna sa mga siglong nanglabay mahitungod sa pamaagi ug tumong sa importanteng panghitabo.

—Pinadayag 1:7 Daghang mga panagna ang nangahitabo sa kon kanus-a ug unsa nga pamaagi kini mahitabo, uban sa mga kasubo tungod kay wala kini magakahitabo sama sa ilang gipaabot..

Karon, daghan pa gihapon ang nagatoo nga ang Ikaduhang Pagbalik ni Kristo dili lamang mahitabo, kondili, dili na kini madugay pa. Matud pa sa gihimo nga bag-ong survey sa Pew Research Center sa Washington, DC, 41% sa mga Amerikano—sa tanang relihiyosong grupo---nagtoo nga ang Ikaduhang Pagbalik ni Hesus mahitabo sa tuig 2050, wala nay kwarenta ka tuig gikan karon. Bisan kadtong mga Amerikano nga walay relihiyosong grupo, 20% ang nagtoo nga si Kristo mobalik sa 2050. Nakita usab sa Pew survey ang makapaikag nga statidistika: Amerikano nga walay kasinatian sa kolehiyo (59%) susama ra sa nakahuman sa kolehiyo (19% lamang) ang nagpaabot sa Ikaduhang Pagbalik ni Hesus sa 2050.

Sa walay pagtagad sa kon unsa ang paglantaw sa tawo niini nga pagtolun-an sa nanglabay mga siglo—o bisan sa kasamtangan nga stadistika---ang Ikaduhang Pagbalik ni Kristo maoy usa sa prominente nga doktrina sa Bibliya. Adunay daghang mga propesiya sa Daan ug Bag-o nga Testamento mahitungod niini. Daghan niini nga nga propesiya ang nakatago sa mga simbolikanhong pinulungan, apan ang uban wala. Samtang nagkalain laing simbolo ang gipanggamit,

kini tanan makanunayon sa usa'g usa kon masabtan lang kini sa husto, ug maklaro ang mga mahinungdanong kasayoran mahitungod sa pagbalik sa Ginoo ug ang panahon sa Iyang Ikaduhang Presensya. Ang kinatумыang tumong niini nga panahon mao ang pag establisar sa dugay na nga gisaad nga tigpataliwala nga gingharian, nga magestabilisar sa balaanong kagustuhan sa tibook kalibutan ug magabuntog sa tanang kaaway sa kamatooran ug katarong.

Ang pag-ila sa duha ka mahinungdanong kasayoran mao ang gikinahanglan sa pagsabot sa mga propesiya mahitungod sa pagbalik sa atong Ginoo ug ang Ikaduhang Presensya. Una, sa Iyang kamatayon, gitugyan niya ang iyang unod, iyang pagkatawo, para sa kinabuhi sa katawhan. Ikaduha, sa Iyang pagkabanhaw pinaagi sa gamhanang gahum sa Diyos, siya gihimaya ngadto sa pagkabalaan, mas labaw pa sa mga anghel, mga punoan ug kagamhanan. (Juan 6:51; Efeso 1:19-22; Col. 1:15; I Pedro 3:18) Pinaagi sa kinaiyahan si Hesus karon dili na siya makita sa tawhanong mata, sama nga ang Diyos dili makita. Tungod kay kini nga nabanhaw, balaang Kristo nga mobalik sa Ikaduhang Pagbalik, ang iyang presensya gikinahanglan nga mailhan dili pinaagi sa pagkakita kaniya sa natural nga mata. Si Pablo miingon sa pagpamatood niini nga mailhan nato si “Kristo dili na tawhanon.”—II Corinto 5:16

Samtang uban sa iyang mga tinun-an sa wala pa siya gilansang si Hesus miingon kanila, “Hamubo na lang ang panahon, ug unya ang kalibutan dili na makakita kanako, apan kamo makakita ra unya kanako.” (Juan 14:19) Ang mga matinud-anong sumusunod sa Magtutudlo makakita ni Hesus sa iyang mahimayaong balaang lawas, tungod kay sa kabanhawan mamahimo silang sama kaniya. Kini siya gipasabot ni Juan sa pag-ingon, “Mga hinigugma, kita karon mga anak sa Dios; kon maunsa unya kita, kini wala pa ipakita, apan kita nasayud nga sa igapadayag na siya, kita mahisama kaniya, kay kita magasud-ong man unya kaniya sa iyang pagkamao.”—I Juan 3:2

MGA PAGPAKITA NI HESUS

Matood nga si Hesus milagrosong nagpakita sa makadaghan ngadto sa iyang mga tinun-an human sa iyang pagkabanhaw. Apan, walay usa niini nga okasyon nga ang mga tinun-an nakakita kang Hesus sa iyang “pagkasiya”—nga, wala nila makita siya sa iyang bag-o ug balaang lawas. Diha sa kinatibuk-an sa Daang Testamento adunay pipila ka mga nahisulat mahitungod sa pagpakita sa mga anghel diha sa tawhanong lawas. Ang mga anghel sa kinaiyahan

dili gayud makita sa natural nga mata, ug sa pagpakita nila ngadto sa tawo aron maghatod ug mensahe gikinahanglan nila nga sila mamahimong tawo. Gihatagan sila ug balaang katungod ug gahum sa paghimo niini, apan dili sila makita sa tawo sa ilang pagkaanghel nga espiritohanong lawas.

Ang nabanhaw nga Kristong balaan aduna usab niini nga gahum, ug iya kining gigamit sa daghang higayon sa dihang nagpakita siya sa iyang mga tinun-an taliwala sa iyang pagkabanhaw ug pagkayab. Atong susihon ang pipila ka mga kasayoran nga may kalabutan niini nga mga pagpakita. Una sa tanan, atong hinumduman nga ang sapot nga gigamit ni Hesus sa tawo pa siya gilabay na niadtong panahon sa paglansang kaniya, ug nga ang iyang sapot sa paglubong kaniya nakita didto sa lubnganan. Ang una niyang pagpakita mao kadtong kang Maria, nga nitoo kaniya nga usa ka hardinero. Matood, nagsuot siya ug sapot sa usa ka hardinero, ang sapot isip parte sa iyang pagkahimong material, sama sa mga panahon sa iyang uban pa nga pagpakita. Si Maria wala makaila kang Hesus pinaagi sa iyang panagway, o sa iyang sapot, kondili sa iyang pamilyar nga tono sa iyang tingog sa pagsangpit niya sa iyang ngalan.—Juan 20:13-16

Lain pang namatikdan nga pagpakita ni Hesus mao ang sa duha ka mga tinun-an sa dihang nangadto sila sa Emmaus. (Lucas 24:13-32) Niini nga okasyon, si Hesus tataw nga nakigestorya sa iyang mga tinun-an sa pipila ka mga oras apan sila wala makaila kaniya. Para kanila siya usa ka “estranghero.” Iyang gipaabot ang maanindot ug makapagana nga mensahe kanila mahitungod sa panginahanglan sa pag-antus ug kamatayon sa Mesias nga nahitala sa mga kasulatan sa Daan Testamento. Apan, wala nila makita kon kinsa kadtong nagpaambit kanila niining maanindot nga inpormasyon ngadto kanila. Wala gayud sila makaamgo hangtud nga natapos ang maong adlaw kon kinsa siya sa dihang nangamuyo sila para sa ilang panihapon. Dayag gayud nga kini gituyo paghimo ni Hesus ang pagpangamuyo sama sa iyang naandan nga ginahimo nga pamilyar na kanila, ug tungod niini sila nakaamgo kon si kinsa siya.

Sa dihang si Hesus nagpakita sa iyang mga tinun-an sa dagat sa Galilea, iyang gipaila iyang kaugalingon kanila pinaagi sa pagsugyot nga ilang ihulog ilang mga pukot sa pikas nga bahin sa sakayan, ug dihadhiha kini napuno sa mga isda. Ang rason nga kini siya matoohan gayud tungod kay iya naman kining gihimo ang sama nga milagro sa dihang iya silang gitawag sa pangalagad. (Lucas 5:1-11; Juan 21:1-14) Ang kada pagpakita ni Hesus lahi sa usa’g

usa, ug samtang kini maoy magsilbing pagpaila nga siya nabanhaw gikan sa mga patay ug sa samang higayon usab ilang maamgohan nga siya nausab na. Nga dili na siya mao ang Hesus nga tawhanon, kon dili usa ka gamhanang espirito nga binuhat nga makangadto nganhi nga dili makita sa tawhanong mata gawas lang kon iyang pilion nga magpakita siya isip usa ka tawhanong binuhat.

“NAGDUHA-DUHANG SI TOMAS”

Usa sa mga makadani nga mga pagpakita ni Hesus ngadto sa iyang mga tinun-an human sa iyang pagkabanhaw mao ang tubag sa gisulti ni Tomas, nga nag-ingon nga dili siya motoo nga ang iyang Magtutudlo nabanhaw kondili niya makita ang mga inagian sa lansang sa iyang mga kamot ug tiil ug ingon usab ang samad sa iyang kilid nga inagian sa espada nga giduslak kaniya sa sundalong Romano samtang si Hesus nagbitay sa krus. (Juan 20:24-29) Wala si Hesus sa dihang kini gisulti ni Tomas, apan, nasayod siya niini ug aron matagbaw ang iyang pagduda nagpakita siya sa tanang mga tinun-an sa ibabaw nga lawak samtang sarado ang purtahan ug giingnan si Tomas nga tan-awon ang iyang mga kamot ug tiil, ug hikapon niya ang iyang kilid.

Kini nga panghitabo sayop nga gisabot nga si Hesus usa ka tawhanon sa kinatibuk-ang walay katapusan, nga adunay kamot, tiil ug may samad sa kilid. Pwede diay usab nato masulti nga si Hesus usa ka Hardinero sa hangtud, o sama sa “estranghero nga nakiguban paglakaw sa duha ngadto sa Emmaus. Unsay may matood nga kahulugan niini nga nga pagpakita ni Hesus? Human gayud sa saysay mahitungod sa espesyal nga pagpakita ni Hesus kang Tomas, si Juan nipasabot nga nag-ingon, “Ug sa atubangan sa mga tinun-an gipanghimo ni Jesus ang daghan pang ubang mga milagro nga wala mahisulat niining basahona.”—berso 30

Sama sa gisulti ni Juan, ang tanang pagpakita ni Hesus ngadto sa iyang mga tinun-an, sa bisan unsa nga lawas nga iyang gigamit niadtong higayona, kadto mao ang mga “timaan.” Wala nila makita ang balaang Kristo, kon dili mao lamang ang lawas nga gigamit niini. Matood, nga nakita nila ang tawhanong unod nga lawas. Nakita ni Tomas nga adunay marka sa lansang ang mga tiil ug kamot. Wala siya makakita ug esiritohanong binuhat kon dili usa ka unod nga lawas nga diin si Hesus milagrosong nagpakita. Dinhi niini nga mga pagpakita ug ang butang nga gisulti ni Hesus ngadto kanila nga sila tanan nakombinsir nga siya nabanhaw gikan sa mga patay. Gisulat ni Lukas mahitungod kang Hesus, “Tapus sa iyang pag-antus, kanila

mipakita siya nga buhi pinaagi sa daghang mga pagpamatuod, nga nagpakita ngadto kanila sulod sa kap-atan ka adlaw, ug nagsulti kanila mahitungod sa gingharian sa Dios.”—Buhat 1:3

SIMBOLIKANHONG PANAN-AW

Ang lehitimong pangutana nga migawas nga kon si Hesus mobalik sa iyang Ikaduhang Presensya isip balaan, dili makitang binuhat, sa unsa man nga posibilidad nga siya makita sa kada mata. Si Hesus ba mamahimo na usab nga tawhanon para makombinsir ang katawhan nga siya nibalik na? Wala kita nitoo nga ingon ana. Kon dili, ang husto nga pagsabot niini nga pamahayag sa atong teksto makita pinaagi sa pag-ila nga ang Bibliya sa daghang higayon migamit sa ideya nga “pagtan-aw” o “panan-aw” nga nagsimbolo sa pagsabot o pag-ila.

Si Hesus nga nagtumong sa ebanghelyo sa gingharian nga iyang gitudlo nag-ingon, nga ang balaang mga tawo kaniadto naninguha nga “makita” kini nga mga butang, apan wala nila mahimo. Dayon sa iyang mga tinun-an, si Hesus nag-ingon, “Bulahan ang inyong mga mata kay nakakita: ug inyong mga dalunggan kay nakadungog.”(Mateo 13:16,17) Dinhi wala siya magtumong sa litiral nga mga mata ug litiral nga panan-aw. Kini siya nagpasabot sa pagtan-aw ug pagsabot nga gihatag ngadto sa mga tinun-an pinaagi sa espesyal nga pabor sa Diyos kanila.

Sa dihang si Job nag-antus sa dakong pagsulay nga gitugotan sa Diyos nga mahitabo kaniya, siya niingon, “Ug sa tapus ang akong panit, kining lawas ko gayud malaglag, Unya sa wala ang akong unod makita ko ang Dios; Kang kinsa ako, ako gayud, motan-aw dinhi sa akong kilid, Ug ang akong mga mata makasud-ong, nga dili ingon sa dumuloong. Naut-ut ang akong kasingkasing sa sulod kanako.” (Job 19:26,27) Si Job ang usa sa mga propeta sa Diyos, ug ato kini siya nga sabton nga propesiya sa panahon nga diin ang himaya sa Ginoo mopuno sa tibook kalibutan, ug ang tanang unod makakita o makasabot, niining tanan. Mao kini ang usa ka simbolikanhong panan-awan kay ang Diyos mismo nideklarar ngadto kang Moses, “Ikaw dili arang makakita sa akong nawong; kay ang tawo dili makakita sa akong nawong ug mabuhi pa siya.”—Exodo 33:20

Sa parte ni Job, adunay usab kini dihadiha nga katumanan sa maong propesiya. Sa dihang iyang nahibaloan ang mahinungdanong leksyon sa dako niyang pagsulay, niingon si Job sa Diyos, “Nakadungog ako mahitungod kanimo tungod sa pagpamati sa

igdulungog; Apan karon, nakita ko ikaw sa akong mata.” (Job 42:5) Dili kadto siya litiral nga pagkakita sa Makagagahum, kon dili ang pagsabot sa iyang pagkamakagagahum, iyang kaalam, iyang gugma ug iyang gahum. Si Job mas pa gayud nga nakasabot sa dakong Magbubuhat isip resulta sa iyang mga pagan-tus ug pagsulay, ug iya kining gihulagway isip hingpit nga pagsabot sa pagtan-aw sa Diyos.

Sa Isaias 52:10 atong mabasa, “Gihukasan ni Jehova ang iyang balaan nga bukton diha sa mga mata sa tanang mga nasud; ug ang tanang mga kinatumyan sa yuta nakakita na sa kaluwasan sa atong Dios.” Kini maoy usa ka simbolikanhong pagpadayag sa panan-aw. Ang “balaang kamot” nga gitumong niini nga teksto mao si Hesus, ang Mesiyas. Una, ang “balaang kamot” “gitamay ug gisalikway” sa katawhan; usa ka tawo sa kasub-anan ug “nakasinati sa kagool.” Gidala siya ingon sa usa ka karnero sa ihawanan, ug ingon sa usa ka karnero nga naamang sa atubangan sa iyang mga maggugunting.”—Isaias 53:3,7

Kini nga “balaang kamot” sa Diyos, nga nahimong “Kordero sa Diyos nga nagawagtang sa mga sala sa kalibutan,” wala gipadayag o “gipahibalo...sa mga mata sa katawhan,” sa iyang Unang Presensya. (Juan 1:29) Ang propesiyanhong “taho” sa iyang kadako isip Mesiyas wala gitooan niadtong iyang kaugalingong nasud gawas niadtong gamay nga minoriya nga nahimong matinud-anon niyang sumsunod. Niabot siya isip “kahayag sa kalibutan” apan ang katawhan nisalikway sa kahayag, ug nagpadayon kini sa kangitngit.

Ang plano sa Diyos nga nakasentro kang Hesus isip iyang “balaang kamot,” aron modan-ag ug manalangin sa tanang kabanayan sa yuta, wala pa gayud matuman. Gisulat ni Isaias, “Ang kahimut-an ni Jehova motubo sa iyang kamot.” (Isa. 53:10) Ang mainantusong buhat ni Hesus niadtong Unang Pag-anhi naghatag ug kaluwasan sa katawhan gikan sa sala ug kamatayon, ug busa mahinungdanon para sa katumanan sa plano sa Diyos sa kaluwasan. Hinoon, hangtud nga wala pa ang “ikaduhang Pag-anhi” nga ang “balaang kamot” mapadayag, o “mapahibalo” sa mga mata sa tanang kanasuran. Ug ang tanang kinatumyan sa kalibutan makakita sa kaluwasan sa Diyos nga diin gihatag ni Hesus niadtong Unang Pag-anhi sa dihang iyang gitagana iyang lawas—iyang kalibutanong kinabuhi—para sa makasasala ug himalatyang katawhan..

Atong gitumbok kini nga propesiya isip lain nga pananglitan sa simbolikanhong gamit sa panan-awan. Walay usa nga makig-away

nga ang propesiya nagtumong sa litiral nga “kamot” sa Diyos. Ang kamot simbolikanhon, ug ang pagpadayag niini sa mata sa kanasuran usab simbolikanhon. Tungod lamang kini sa sayop nga pagsabot sa kadaghanan mahitungod kang Hesus sukad sa iyang pagkabanhaw, ug ang pamaagi sa iyang pagbalik, nga ilang gihanduraw si Hesus nga litiral nga nagpakita sa panganod isip tawo, ug ang litiral nga mata nga nagtan-aw kaniya. Kon atong susihon kini nga propesiya diha sa pagrason, ingon man usab ang uban mga kasulatan diin ang panan-aw ug mata ang gigamit sa pagpanabot, mamahimo na kini siyang masabtan ug han-ay uban sa kinatibuk-ang testimonya sa Pulong sa Diyos.

SIYA MOABOT UBAN SA MGA PANGANOD

Ang unang bahin sa sinugdanang teksto mabasa, “Tan-awa, siya umalabut uban sa mga panganud ug makita siya sa tanang mata.” Kon sa litiral nga pagsabot, ingon sa lain kini nga pamahayag, tungod kay bisan unsa, o bisan unsa nga binuhat, nga magagikan “uban sa panganod” malagmit matabonan sa panganod. Apan, ang pinulungan niini nga propesiya nagpasabot nga dinhi niini mismo nga “panganod” ang mopadayag sa presensya sa Diyos. Ang panganod gigamit sa mga propesiya sa Bibliya sa pagsimbolosa kasakit ug kasamok, ug gipasabot ni Hesus ngadto sa iyang mga tinun-an nga ang usa sa timaan sa iyang pagbalik ug Ikaduhang Presensya mao ang panahon sa “dakong kagul-anan” —Mateo 24:21,22

Ato na karong timan-an ang dugang pa nga simbolikanhong propesiya, nga gitala ni Lucas: “Ug aduna unyay mga ilhanan diha sa Adlaw ug sa Bulan ug sa kabitoonan, ug diha sa yuta adunay kagul-anan sa kanasuran, nga managkalibug tungod sa dinaguok sa dagat ug sa mga balud; ang mga tawo panguyapan sa kalisang ug sa pagpaabut sa mahitabo sa kalibutan; kay mangatay-og man unya ang mga gahum sa kalangitan. Ug unya ilang makita ang Anak sa Tawo nga magaabut nga sinapwang sa panganud inubanan sa kagahum ug dakung himaya.”—Lucas 21:25-27

Gikutlo usab ni Mateo ang parte nining mao nga propesiya nga mabasa, “Ug unya magapakita diha sa langit ang ilhanan sa Anak sa Tawo, ug unya ang tanang kabanayan sa yuta manag-minatay, ug ilang makita ang Anak sa Tawo nga moabut nga sinapwang sa mga panganud sa langit inubanan sa kagahum ug dakung himaya.” (Mateo 24:30) Adunay daghang ebidensya nga ang kalibutan karon nakasinati na sa daan na nga nahisulat “dakung kasakitan,” ug adunay nay dakong kagul-anan sa bahin sa “tanang tribu saa yuta.”

Ang kalibutan sa kinatibuk-an wala pa gayud makasabot sa husto sa gipasabot sa “kagul-anan sa mga nasud inubanan sa kalibog.” Niadtong wala kaayo mahibalo sa “siguradong pulong sa propesiya,” kini nga “timailhan sa anak sa tawo” wala pa mismo makita. Hinoon, sa husto nga panahon kini mahitabo, ug dayon ang “kada mata” makasabot sa buot ipasabot sa “pagsulay,” ug masabtan nga si Kristo nibalik aron magestabilisar sa iyang dugay na nga gisaad nga gingharian. Matood, nga gani karon, ang mga matinud-anon nga “nagbantay,” apan kini lamang sila, ang makakita sa daghanang mga paghimatood nga si Kristo nibalik na, nga dili makita, ug nagahimo na sa mga gikinahanglang buluhaton pag-andam sa pagestabilisar sa iyang gingharian.

SILA NGA NAGDUSLAK KANIYA

Ang atong teksto naghatag ug gibug-aton nga “sila usab” nga nagduslak kang Hesus “makakita kaniya, ug uban ang “tanang kaliwatan sa yuta,” magdanguyngoy, o magbangutan tungod kaniya. Ang pagbangutan sa parte niadtong mga nagduslak kaniya mao nga tungod sa pagsalikway nila kaniadto sa Mesiyas. Atong mabasa, “Ug igabubo ko ibabaw sa balay ni David, ug sa mga pumoluyo sa Jerusalem, ang espiritu sa gracia ug sa mga pagpangamuyo; ug sila motutok kanako nga ilang gipalagbasan; ug sila magabalata tungod kaniya ingon sa usa nga magabalata tungod sa iyang anak nga lalakeng bugtong, ug maga-antus sa kapait tungod kaniya, ingon sa usa nga nagaantus sa kapait tungod sa iyang panganay nga anak.”—Zech. 12:10

Ang maong masulub-on nga kondisyon tungod sa ulahi na nga pag-ila sa mga Judeo kang Hesus nga ilang Mesiyas. Ang mga propesiya nagpadayag nga kini nga pagbangutan mahitabo sa hapit na matapos ang dakung pagsulay diin ang tanang kaliwatan sa kalibutan usab magbangutan tungod sa kasakitan nga ilang giagian. Ang katausan niining pag-antus sa Armagedon, mahitabo matud pa sa mga propesiya, sa karaang yuta sa Israel, diin daghan na karon ang mga Hudeo nagatigum sukad sa ilang panagtigum pag-usab isip usa ka nasud niadtong 1948.

Mga propesiya mahitungod niini nahitala sa ika 38 ug 39 nga kapitulo sa Exequiel. Ang bersikulo 8 sa kapitulo 38 nakatumong ngadto sa Israel, ug mabasa, “Sa tapus sa daghang mga adlaw ikaw pagadu-awon: sa ulahing mga tuig ikaw mosulod sa yuta nga nabawi gikan sa espada, nga ginatigum gikan sa daghang mga katawohan, ibabaw sa kabukiran sa Israel, nga nahimong awa-aw sa

kanunay; apan gipagula gikan sa mga katawohan, ug sila magpuyo sa kasigurohan, silang tanan.” Para kang Gog ug iyang agresibong mga tinawo---ang kaaway sa Israel—gihimo ang pamahayag, “Ug ikaw motungas, ikaw moabut ingon sa usa ka bagyo, ikaw mahimong ingon sa usa ka panganod nga motabon sa yuta, ikaw, ug ang tanan mong mga tinawo, ug ang daghang mga katawohan uban kanimo.”—berso 9

Kini nga propesiya nagpadayag ug dugang pa nga detalye mahitungod niini nga pagsulong kontra sa mga nagkatipok ug balik nga mga Hudeo sa nasud sa Israel, ug nagpadayag nga niining katapusang pagantus ang Diyos manalipod sa iyang katawhan kontra sa iyang mga kaaway. Atong mabasa, “Ug ako magpatawag sa usa ka espada batok kaniya ngadto sa akong tanan nga kabukiran, nagaingon ang Ginoong Jehova: ang tagsatagsa ka pinuti sa tawo mahimong batok sa iyang igsoon nga lalake, Ug magapakanaug ako sa hukom batok kaniya uban ang kamatay ug uban ang dugo; ug paulanan ko siya ug ang iyang mga tinawo, ug ang daghang mga katawohan nga ming-uban kaniya, sa ulan nga makapabaha, ug sa dagkung mga ulan-nga-yelo, kalayo, ug azufre. Ug ako magapadaku sa akong kaugalingon, ug magabalaan sa akong kaugalingon, ug ako magapaila sa akong kaugalingon sa mga mata sa daghang mga nasud; ug sila makaila nga ako mao si Jehova.”—bersikulo 21-23

Sa walay pagduhaduha kini nga paghulagway sa hinagiban nga gamiton sa Diyos sa niadtong nagaalirong sa Israel niining katapusang pakigbisog sa Armagedon kadaghanan simbolikanhon. Dili nato mahibaw-an ang detalye niini ug unauna. Ang mahinungdanon nga punto dinhi mao nga isip resulta sa pagpanginlabot sa Diyos niini nga pakigbisog, ang mga kanasuran mahigmata. Mailhan nila nga sila napildi dili tungod sa mas labaw nga hinagiban o abilidad sa pakig-away sa mga Israelita, kon dili sa langitnong gahum. Kini nga pagpanginlabot magagikan diha sa nibalik nga Hesus, ug busa matuman ang mga pulong sa atong teksto nga “tanang mata” makakita kaniya.

Samtang ang “tanang mata” sa katapusan makaila sa kahulugan kon unsay mahitabo sa mga ulahing adlaw sa Armagedon, ang mga matinud-anong nahibilin nga mga Judeo nga niila kang Kristo isip ilang Mesiya nga maoy tinubdan sa ilang kadaugan ibabaw sa imposibleng tawhanong kalisdanan mao ang unang makabenepisyo niini nga kasinatian. Ang uban mao ang mosunod ug “makita” nga siya mismo ilang giduslak ang nagtugyan kanila. Sa ingon, ang

propesiya ni Exequiel nagpadayon: “Ug ipaila ko ang akong balaan nga ngalan sa taliwala sa akong katawohan nga Israel; ni itugot ko pag-usab nga pasipalahan pa ang akong balaan nga ngalan: ug ang mga nasud makaila nga ako mao si Jehova, ang Balaan sa Israel.”—Exequiel 39:7

Ang hinapos nga bahin sa dakong kagul-anan gihulagway usab ni Propeta Zacarias sa panahon nga ang tanang kanasuran magbangutan. “Ania karon, ang adlaw ni Jehova moabut na, sa diha nga ang imong mga sinakmit pagabahinon diha sa taliwala nimo, Oh Sion. Kay tigumon ko ang tanang mga nasud sa pagpakiggubat batok sa Jerusalem; ug ang ciudad pagaagawon, ug ang mga balay pagatulisan, ug ang mga babaye pagalugoson; ug ang katunga sa ciudad mahiadto sa pagkabinihag, ug ang salin sa katawohan dili pagaputlon gikan sa ciudad. Unya si Jehova moasrang, ug makig-away batok niadtong mga nasud, sama sa iyang pagpakig-away sa adlaw sa gubat.”—Zacarias 14:1-3

Samtang kini nga propesiya nagpadayag nga sa katapusan luwason sa Diyos ang iyang katawhan sa Israel gikan sa iyang mga kaaway, dili kini mahitabo hangtud nga sila makaangkon ug hilabihan nga kasinatian gikan sa kamot sa ilang mga kaaway nga nasud. Dili kita mahibalo ug unauna sa detalye sa pamaagi diin kining tanan nga panghitabo matuman. Hinoon, basis sa mga nahisgotang mga propesiya, ingon sa daw tataw ng adunay mahitabong kagubot sa nagkatipok pagbalik nga mga Israelitas sa dili pa makita ang langitnong pagpanginlabot para kanila.

Kon ang langitnong pagpanginlabot mahiabot gayud, kini siya pinaagi kang Kristo ug ang iyang gihimayang sakop sa lawas. Kini nga Kristohanong hugpong mao amg mamahimong espiritoanong magdumala sa Mesiyanhong gingharian nga magpakita ug otoridad ug gahum diha sa mga kalihukan sa katawhan. Usa sa dako nga katumanan niana nga gingharian mao ang kalamdagan sa katawhan mahitungod sa matood nga Diyos ug kon unsa iyang kagustuhan para kanila. Kini nagkinahanglan sa tibook nga panahon sa gingharian para sa iyang katumanan. Una, ang henerasyon nga nabuhi niadtong panahona makasaksi sa gahum ug dakong himaya a pagsugod sa iyang gingharian. Dayon, mahitabo ang hinayhinay nga pagbanhaw sa mga minatay—ang tanang nangamatay gikan ni Adan. Kining tanan nga bilyones pagatudloan mahitungod sa Diyos ug iyang balaod sa katarong.

“Ang kasugoan mogula gikan sa Sion, ug ang pulong ni Jehova

gikan sa Jerusalem.” Atong mabasa sa Micah 4:1-4. Dinhi ang “Sion” mao ang simbolo sa espiritoanong bahin sa gingharian nga gilangkuban ni Hesus ug iyang gihimayang iglesya nga makauban ni Kristo diha unya sa iyang pagdumala sa usak ka libo ka katuigan. (Pinadayag 20:6) Ang “Jerusalem” nagrepresentar sa tawhanon, o makita, nga bahin sa gingharian. Kini siya maglangkob niadtong mga karaang, matingud-anong sulugoon sa Diyos, sugod sa kang Abel. Si Juan Bautista tingali mao ang katapusan niini. Kini sila ang mamahimong “prinsipe sa tanang kayutaan.”—Salmo 45:16

Ang “pulong sa Diyos,” o ang kamatooran mahitungod sa Diyos ug sa iyang pagbuot ug balaod, mapahibalo sa katawhan pinaagi sa iyang mga tawhanong representante sa gingharian. Kini sila mao ang mga kalibutanong magdumala sa gingharian. Ang mga masinundanon sa gingharian, sugod sa mga nahibilin nga nagtoong mga Israelitas mag uban sa pagpasabot sa uban. Kining dako nga buluhaton dili mahuman sa usa lang ka higayon. Sa pagkutlo sa mga pulong sa propeta: “Ug mahitabo niadtong adlaw nga walay suga; ug kadtong mga mahayag nga bitoon mongiob sa ilang kaugalingon: Apan kadto maoy usa ka adlaw nga nahibaloan ni Jehova; dili adlaw, ug dili gabii; apan mahitabo nga sa panahon sa kahaponon motungha ang kahayag.”—Zech. 14:6,7

Ang kahayag mao ang simbolo sa kamatooran—sa pagsabot—apan ang kahayag sa gingharian dili kini bug-os nga masabtan hangtod sa katapusan sa usa ka libong katuigan. Sama sa gideklarar sa atong teksto, ang “tanang mata” makasabot sa presensya sa Magtutudlo sa panahon sa pagsugod sa mao nga adlaw, apan daghan pa kaayo ang mahikat-onan sa katawhan. Sa ato usab nga nakita, adunay dugang pa nga buluhaton sa pagpatin-aw niadtong tanan nga gibanhaw gikan sa kamatayon. Hangtud sa hapit na matapos ang panahon nga ang ang pandong sa sayop nga pagsabot ang pagabuklaron gikan sa mga mata sa katawhan. (Isaias 25:7) Ug sa mao dayon nga panahon nga ang yuta mapuno sa kahibalo kang Jehova, ingon sa mga tubig nga nagatabon sa dagat.—Isaias 11:9

Dili lamang ang katawhan makadawat ug panalangin sa katin-awan, apan kalinaw, panglawas, ug kinabuhi ang modagayday ngadto sa katawhan. Ug ang Ginoo nga si Jehova mopahid sa mga luha gikan sa tanang mga nawong; ug ang kaulaw sa iyang katawohan pagakuhaon niya gikan sa halayo sa tibook nga yuta. (Isaias 25:8) Matood, nga ang paglaum sa Israel ug sa katawhan sa tanang kanasuran mahimayaon gayud. Samtang ang kasakit ug

kasamok mikaylap sa kalibutan karon, kini nga kahimtang karon ang sa dili madugay magahatag ug dapit sa otoridad ni Kristo sa gingharian pinaagi sa mga ahensya nga diin walay katapusang kalinaw, kasigurohan, kalipay ug kinabuhi niadtong tanan nga masinundanon nga katawhan. Ang katawhan unya tugob sa pagmaya samtang ilang makita ug masabot dili lamang si Kristo, kon dili ingon man usab ang ilang mahigugmaon nga Langitnong Amahan, ang Diyos sa ilang kaluwasan!—berso 9 ■

Ang Pagdasig Gihatag Pinaagi Sa Pag-ampo

Yabeng Bersikulo: “***Ang among paglaum alang kaninyo dili matarug; kay kami nasayud nga maingon nga kamo nagapakig-ambit man sa among mga pag-antus, kamo magapakig-ambit man usab sa among kalipay.***”- ***II Corinto 1:7***

Napiling Sulat: II Corinto 1:3-11

Cristo.-II Cor. 1:1,2

Si Pablo nagpadayon, nga nagaingon: “Dalaygon gayod ang Dios ug Amahan ni Hesu-Kristo nga atong Ginoo. Maluloy-on siya nga Amahan, ug Dios siya nga kanunayng nagadasig kanato, Gidasig niya kita sa tanan natong mga kalisdanan, aron nga pinaagi sa pagdasig niya kanato madasig usab nato ang uban nga anaa sa kalisdanan. Kay bisan pa ug daghan ang atong naambitan nga mga pag-antus ni Cristo, daghan man usab nga mga pagdasig ang atong nadawat pinaagi kaniya.” (Bersikulo 3,4) Nakahimo si Pablo sa pagdasig sa uban tungod kay maskin tuod nag-antos siya ug daghang mga kasakitan tungod sa pagsaway alang sa ngalan ni Cristo, bisan pa man niini nakadawat siya ug langitnong pagdasig nga maoy nakapalig-on kaniya sa taliwala sa iyang mga pag-antus. --Bersikulo 5,6

Ang atong Yabeng Bersikulo naghatag ug gibug-aton sa pagsalig ni Pablo nga ang mga pag-antus sa mga kaigsoonan nga mga taga-Corinto mas labaw pang masuklian pinaagi sa mga kalipay sa

ilang pagkahinimong anak diha sa espiritu ingon nga mga Bag-ong Binuhat niining kinabuhia. Kon magpabiling matinud-anon, makabaton pa gyod sila ug dugang pang paglaom sa espirituhanong pagkahimugso ug makaangkon ug usa ka langitnong kabilin. Mao kini makapahimo nilang malipayon diha sa presensiya sa Amahan sa tibuok kahangturan.

Dayon palakbit nga gihisgotan ni Pablo ang mga mapait nga mga pagsuway nga nidangat kaniya didto sa Asia maskin pa ang ensakto nilang kinaiyahan wala gayod gihisgotan. Pero iyang giila nga ang Dios, kinsa nagluwas kaniya kaniadto, magapadayon pa gihapon sa paghatag kaniya sa gikinahanglanong kusog aron sa paglahutay hangtud sa panahon nga siya mamahimong hingpit nga gawasnon gikan sa mga pag-antus gumikan sa iyang pagkamatinud-anon sa pagsunod sa mga lakang sa Agalon.-Bersikulo 8-10

Sa Bersikulo 11 atong nabasa, “samtang gitabangan ninyo kami pinaagi sa inyong mga pag-ampo. Ug tungod sa mga panalangin nga among madawat gikan sa Dios ingon nga tubag niya sa pag-ampo sa daghang mga tawo, daghan usab ang magapasalamat kaniya.” Dinhi giila ni Pablo ang kamahinungdanon sa pag-ampo sa uban alang kaniya, busa nagsilbi nga ehemplo nga angayang sundogon sa atong pagpangalyupo sa Trono sa Langitnong Grasya aron sa paghatag ug ayuda alang sa mga konsagradong magtotoo kinsa naluya ilawom sa gibug-aton sa nagkalain-laing mga pagsulay.

Ang pagpanglutos tungod sa pagkamatarong masinatian gayod sa tanang mga pinili sa Ginoo diha sa ilang mga kinabuhi. Sumala sa unod, walay ni usa kanato nga nagatinguha sa ingon niana nga mga pag-antus. Pero, tungod kay nanumpa man kita nga mosunod sa panag-ingnan sa Agalon, kinahanglan nga makusganon kitang maningkamot sa pagmantala sa kamatuoran sa gingharian sa Dios ug ang gisaad nga mga panalangin alang sa katawhan bisan pa man sa oposisyon nga atong ma- engkuwentro gikan sa uban. Kanang ingon niana nga mga pagsulay nga atong nahiajukan niining kasamtangang panahon wala ra na ikompara sa himaya nga mosunod, kon magmatinud-anon.

Nga unta ang matag usa kanato magatamod sa daghan natong mga panalangin, bisan pa sa dihang kita pagalutuson, ingon nga usa ka tinubdan sa kusog samtang naningkamot kita nga magmatinud-anon sa atong pagtawag.-Mateo 5:10-12 ■

Ang Usa Ka Komunidad Nipasaylo

Yabeng Bersikulo:
“Bisan kinsa nga
inyong pasayloon,
pagapasayloon
ko usab; kay
bisan unsay
akong gipasaylo,
kon aduna man
akoy gipasaylo,
nahimo ko kadto
tungod kaninyo
sa atubangan ni
Cristo.”-II Corinto
2:10

Napiling
Kasulatan: II
Corinto 1:23-2:11

Usa sa labing malisod sabton nga prinsipyo sa Kasulatan mao ang kon unsa ka husto ang pagpasaylo sa usa ka igsoon nga nasayop pagkahuman sa ilang paghinulsol. “Magbantay kamo; kon ang imong igsoon makasala, badlonga siya, ug kon siya maghinulsol, pasayloa siya. ug kon sa usa ka adlaw makasala siya sa makapito batok kanimo, ug sa makapito magabalig siya kanimo ug magaingon, ‘Nagbasol ako, ‘kinahanglan pasayloon mo siya. “-Lucas 17:3,44

Ang katuyoan sa ingon niana nga pagbadlong nga gihisgotan sa Agalon niini nga mga bersikulo dili aron pakaulawan ang nakasala o pagsalikway kaniya sa kahangturan. Hinuon, aron ang gitinguha nga paghinulsol sa maong tawo makab-ot

uban ang paglaom nga ipahiuli siya sa pagpakiig-uban sa Ginoo ug sa iyang mga kaigsoonan.

Dinhi nga leksyon si Pablo nagasulat sa mga kaigsoonan sa Corinto nga nagpasabot kanila nga ang iyang plano nga pagbisita wala nadayon tungod kay dili siya gusto nga makapasamot sa ilang kaguol pinaagi sa iyang pagbadlong kanila gumikan sa mga dili maayong mga buhat nga nagapanghitabo taliwala kanila. Ang iyang tinguha mao nga ang mga kaigsoonan magadawat niini nga sulat, dili aron hunahunaon nga makapahimo nilang labi pang magul-anon imbes nga kini pagalantawon nga ebidensiya nga ang tim-os nga panag-ingnan sa katarong modaog gayod sa tanan nilang pagabuhaton. - 2 Corinto 2:1-4

Nagpadayon si Pablo: “Apan kon aduna man dihay nakapahimog kasakit, siya wala maghimo niini kanako, kondili sa usa ka bahin (sa

walay pagpakapin ug sulti) kaninyong tanan. Alang sa maong tawo, igo na ang silot nga gikapahamtang kaniya sa kadaghanan kaninyo.” (Bersikulo 5,6) Ang mga magtotoo sa Corinto tataw kaayo nga nisalikway sa maong sad-an gikan sa ilang panagtigum. Sa pagbuhat niini, sa laing bahin, gipahinumdoman usab ang mga kaigsoonan ni Pablo mahitungod sa kinahanglanon sa pagpahiuli sa usa ka igsoon sa ilang panagtigum pagkahuman sa iyang kinasingkasing nga pagbasol ug pagbag-o sa hunahuna. -Bersikulo 7-9

Sa atong Yabeng Bersikulo, buot ni Pablo nga makahibalo ang mga kaigsoonan nga tungod sa ilang pagkamatinumanon sa gikinahanglanon sa Kasulatan kabahin niining butanga, karon nahiuyon na gayod siya uban kanila. Kon aduna may butang nga angay niyang pasayloon, alang sa ilang kaayohan ug nga nahisubay kon unsa man ang pagtan-aw ni Kristo sa maong panghitabo, iya na kining gibuhat.

Si Satanas andam gayod kaayo sa paglit-ag kanato diha sa iyang malimbongon nga mga paagi. Sa sitwasyon nga gihulagway, mahinangpon niyang pagadawatong nga ang mga kaigsoonan nga maga tolerar sa sala sa ilang kongregasyon. Kon mapakyas sa pagkab-ot niini, ang kaaway magatagbaw sa iyang kaugalingon pinaagi sa paglumos sa mabinasolon nga makasasala sa dili matukib nga kaguol kon dili dayon mahiuli sa panagtigum. Kanunay nga magabantay gayod kita nga mabuntog kini nga mga lit-ag sa diyablo. - 1 Pedro 5:8

Sa wala pa ang iyang pagkausab didto sa dalan paingon sa Damasko, ingon nga Saulo sa Tarso, gibasol sa apostol ang iyang kaugalingon tungod sa iyang paglutos sa mga sumusunod ni Kristo bisan tuod gikaingon niya nga nagbuhat lamang siya sa kabubut-on sa Dios. Sa ingon, nakadayeg gayod siya pag-ayo sa pagpakita sa kaluoy ug pagpasaylo sa Amahan human sa iyang pag-ila sa sayop nga iyang nahimo. - 1 Corinto 15:9

Diha sa atong mga kahuyangon ug kakulangon, angay kitang magmapasalamaton nga ang atong maluloy-ong Langitnong Amahan mapailobon kanato basta nagapadayon lang kita sa pagtutok sa pagkamasinugtanon sa Iyang kabubut-on. Ang atong kapasayloan sa Dios nagadepende kini sa atong pagbuhat sa samang paagi niadtong nakalapas usab kanato. - Mateo 6:14,15 ■

Mga Mahalong Butang Nga Gisulod Sa Kolon

***Yabeng Bersikulo:
“Kami ginasakit sa
tanang paagi, apan wala
manghiubos; nangalibog,
apan wala kawad-i sa
paglaum. ginalutos,
apan wala ikapanugyan;
gipamunalan hangtud sa
pagkapukan, apan wala
mangalaglag.”-II Corinto
4:8,9***

***Napiling Sulat: II
Corinto 4:2-15***

Sa atong leksyon karong adlaw, gideklarar ni Pablo ang iyang responsibilidad ug ingon man usab sa ubang mga sulugoon ni Cristo sa pagsangyaw sa Maayong balita diha sa kaklaro, kaligdong ug kamakanunayon nga modan-ag diha sa pulong sa Dios. Ang pagkamatinud-anon niini nga tahas nagkinahanglan nga ang mga magtotoo magalikay sa pagpresentar ug pangagpas lamang, tawhanong tradisyon, maayo lamang paminawon nga mga pulong aron sa pagdani sa uban nga mamahimong komitadong

sumusunod ni Cristo. - 2 Corinto 4:1,2

Sa bersikulo 3-5 sa atong leksyon, atong nabasa: “Apan kon may mga tawo nga dili makasabot sa Maayong Balita nga among gisaysay, kana mao ang mga tawo nga nangawala: ang mga hunahuna sa mga dili magtotoo gibutaan sa dios niining kalibutana, aron sila dili makakita sa kahayag sa Maayong Balita sa himaya ni Cristo nga mao ang dagway sa Dios. Kay ang among ginawali dili ang among kaugalingon, kondili si Hesu-Kristo ingon nga Ginoo, ug kami ingon nga inyong mga ulipon tungod kang Hesus.”

Kadaghanan sa kalibutan nabutaan sa mga kamatuoran nga anaa sa pulong sa Dios, ug sa husto nga paghiayon sa Maayong Balita ni Kristo pinaagi sa mga limbong sa Kaaway. Tungod lamang gayod sa gahom sa Dios nga ang mga kasingkasing sa Iyang mga anak nalamdagan aron makaila sa maanindot nga plano sa kaluwasan nga anaa sa Bibliya. Ang Iyang gasa nga Espiritu Santo gisusama sa usa ka bahandi nga makaplakan nga nagapuyo sa atong mahuyang nga mga tawhanong lawas aron ang atong bag-ong mga hunahuna makahimo sa pagsabot sa mga kamatuoran sa Iyang Pulong. Gani,

ang plano sa Dios masabtan lamang niadtong ginatawag gikan sa kangitngit sa Langitnong kamatuoran.

Gipahinumdoman kita ni Pablo sa mahuyang natong kahimtang sa Bersikulo 7 sa atong leksyon, nagainggon nga “Aduna kami bahandi sa mga sudlanang yuta aron sa pagpadayag nga ang labaw’ng gahum iya sa Dios ug dili gikan sa among kaugalingon.” Magpabilin kini nga mapadayonon nga mapaubsanong hunahuna sa mga konsagradong katawhan sa Ginoo. Ang kamatuoran diha sa Pulong sa Dios usa gayod ka dakong bahandi, ug bisan kita mahuyang nga mga sudlanang yuta, ang atong Langitnong Amahan, pinaagi sa Iyang gahom, nisalig kanato nga mamahimong piniyalan ug alagad sa Iyang mahimayaang plano sa kaluwasan.

Ang atong mga Yabeng Bersikulo nagapahinumdom kanato nga ang pagsunod sa mga lakang sa Agalon magadala kanato ngadto sa usa ka agianan nga supak sa espiritu sa kalibutan. Moresulta kini sa oposisyon gikan niadtong magalutos o mogamit kanato diha sa dautang motibo tungod sa atong konsagradong pagkinabuhi. Ingon nga mga igsoon diha ni Kristo, dili nato hunahunaon nga talagsaon nga makasinati kita ug malisod kaayo nga mga pagsulay tungod sa atong pagkamatitud-anon sa kamatuoran ug katarong. Sama nga ang Agalon, atol sa iyang pagduaw dinhi sa yuta niantos ug hilabihan nga pag-antus, kay ang tanan nga magkinabuhi nga Diosnon diha kang Kristo Hesus mag-antos gayod ug paglutos. Ang pagka-Diosnon nagsugyot nga kita ginapalihok pinaagi sa mga prinsipyo sa katarong ug nagpadayag ug hustisya ug pagkamaayo, dili tungod kon unsay hunahunaon sa uban mahitungod niini, hinonoa usa kini ka pagsulay sa pagsunod sa langitnong mga panag-ingnan.

Pagkadako gayod nga pribilihiyo nga aduna kitay haduol nga relasyon sa atong Manunubos. Nagbilin Siya kanato ug ehemplo nga pagasundon samtang gipalambo nato ang mga kinaiya nga makapahimo kanato nga kabahin sa maloloy-ong Labawng Pari. Kon matitud-anon sa pagbuhat niini, mamahimo kita, kauban ni Hesus, atong Pangulo, nga magapanalangin sa tawhanong pamilya atol sa naghinangat na nga paghari sa katarong dinhi sa yuta. ■

Usa Ka Paghangyo Sa Pagpakig-uli

Yabeng Bersikulo:
“Buksi alang kanamo
ang inyong mga
kasingkasing; kay wala
kami magbuhat ug dili
matarong kang bisan
kinsa, wala kami magdaut
kang bisan kinsa, ug wala
kami mamintaha kang
bisan kinsa.” -II Corinto
7:2

Napiling Kasulatan:

II Corinto 6:1-13; 7:2-4

Niini nga leksyon, nagapahinumdom kanato si Pablo mahitungod sa usa ka dakong dungog alang kanato nga mamahimong kauban sa buhat sa Dios diha sa pagtabang nga matuman ang Iyang dakong plano sa kaluwasan nga maghatag ug kaayohan sa tibuok pamilya sa katawhan atol sa Gingharian sa Mesias. Atol niining kasamtangang Panahon sa Maayong Balita, adunay usa ka talagsaong kahigayonan alang sa lawas ni Kristo aron nga molambo ug maandam alang sa iyang umaabot nga buluhaton pinaagi sa pagtubag sa imbitasyon diha sa pagsakripisyo sa iyang yutan-ong mga katungod ug mga pribilihiyo ug nga mausab ngadto sa panagway sa atong Agalon. - 2 Corinto 6:1,2

Gihulagway dayon ni Pablo kon giunsa niya pagtuman ang iyang tahas diha sa pag-alagad sa kawsa ni Kristo. Sanglit kay nahibaloan man nga siya sulugoon sa Labing Halangdon, kanunay siyang naninguha sa pagkinabuhi nga naangay sa iyang pagtawag. Nilahutay siya sa pagbuhat sa kabubut-on sa iyang Amahan bisan pa sa kasakit sa lawas nga iyang giantos. Dugang pa, ang iyang mga pagbudlay inubanan sa kinaiya sa kaputli, kahibalo, gugma, ug pagkamasinugtanon sa Pulong sa Dios. Nakabaton siyag kusog pinaagi sa Diosnong gahom, ug kanunay gayod nga nag-una sa tanan niyang mga kalihokan ang panag-ingnan sa katarong, aron nga ang pagpangalagad dili pagasawayon. Pero, naghigot siya ug grabi kaayo nga kalainan diha sa iyang pagpangalagad alang kang Cristo, nga nakabaton na ug hataas daw atua sa ibabaw sa bukid ug daw atua usab sa patag nga klase sa mga kasinatian, ug nahimong butang sa maayo ug dautan nga taho. Wala niining mga butanga

ang niyugyog kaniya gikan sa usa ka determinasyon nga itahan ang iyang kinabuhi sa matag adlaw ingon nga usa ka sumusunod ni Cristo. Kini nga bahin sa iyang sulat angay gayod kanato ingon nga usa ka sumbanan nga angayang sundugon. - Bersikulo 3-10

Sa pagpadayon sa iyang mga pahimangno, si Pablo nagaingon, “Ayaw gayod kamo pakighiusa sa mga dili tumutuo: Kay unsa may kigkomboyahan sa pagkamatarung ug sa pagkadautan? O unsa may pakig-ambitan sa kahayag ug sa kangitngit? Unsa may pakig-uyonan ni Cristo kang Bilyal? O unsa may iya sa magtotoo nga kapakigsalohan sa dili magtotoo? Unsa may pakig-uyonan sa templo sa Dios ug sa mga diosdios? Kay kita mao ang templo sa Dios nga buhi; sumala sa giingon sa Dios: Ako mopuyo sa sulod nila ug magalihok diha kanila, ug ako mahimong ilang Dios, ug sila mahimong akong katawhan. - Bersikulo 14-16

Ang nahaunang texto nagapahinumdom kanato nga isip mga magtotoo ang atong mga kinabuhi kinahanglan nga lahi gayod gikan niadtong wala nagkonsagrar sa ilang kinabuhi sa Dios. Dili man gyod nato mahimo nga ilain sa hingpit ang atong mga kaugalingon gikan sa mga impluwensiya sa gawas. Hinuon, ania kita sa kalibutan apan wala nagaambit sa espiritu niini. - 1 Juan 2:15-17

Lain pa nga importante kaayo nga tambag nga ginahatag niini nga leksyon adunay kalabotan sa katinuoran nga nakadawat kita ug daghang mga bililhong mga saad mahitungod kon unsa man ang ihatag sa Dios alang sa Iyang matinud-anong mga anak. Ang pagbaton niini nga mga kasiguradohan, angay gayod nga ang katarong motuhop kanato aron ang makalimpyong gahom sa Kasulatan magatabang kanato sa matag adlaw diha sa pagpadayag sa pagkabalaan diha sa atong pagkinabuhi. - 2 Corinto 7:1

Sa atong Yabeng Bersikulo, si Pablo nihangyo sa mga kaigsoonan sa Corinto ug sa uban pang mga magtotoo nga nakabenepisyo sa iyang mga panaw. Nihangyo siya nga ilang susihon ang integridad sa iyang pagpangalagad, ug nagpahayag sa iyang tinguha nga ilang madawat ang pinakamensahe sa iyang mga tambag diha sa pagpursigir sa ilang kaugalingong mga kinabuhi diha sa pagkabalaan.

Tataw man kaayo nga si Apostol Pablo gigamit gayod pag-ayo sa Langitnong Amahan isip usa ka kasangkapan sa pagpasig-uli aron sa pagtuman sa langitnong katuyoan. Atong patalinghogan ang pahimangno niining matinud-anong sulugoon aron kita usab mamahimong sumasalmot niini nga mahinungdanong buluhaton. ■

Ang Komunidad Nga Nanag-ambitay Sa Ilang Kabtangan

Yabeng Bersikulo:
“Karon, maingon nga kamo nanghawod man sa tanang butang--sa pagtoo, sa pagpamulong, sa kahibalo, sa tanang pagkamainiton, ug sa inyong gugma alang kanamo--panlimbasugi nga kamo manghawod usab unta niining maong grasya sa paghatag.”-II Corinto 8:7

Napiling Sulat: II Corintho 8:1-14

nga nag-alagad sa Dios, susama sa mga magtotoo sa Macedonia, malipayon kaayo nga mohatag ug gikinahanglanon nga tabang sa ubang mga Kristohanong kaigsoonan kon itugot sa kahigayonan. - II Cor. 8:1-4

Sa pagkonsiderar sa mga panalangin nga madawat sa mga kaigsoonan sa Macedonia tungod sa ilang dili makaugalingon nga paghatag, giaghat ni Pablo si Tito sa pagdala niining maong butanga ngadto sa iglesia sa mga taga-Corinto. (Bersikulo 5,6) Sa atong Yabeng Bersikulo, giila pa-una ni Pablo ang pagtoo, kahibalo, paghigugma maingon man usab ang lain pang mga hiyas nga iyang naobserbahan nga anaa sa mga kaigsoonan nga mga taga-Corinto. Apan, siya nagtinguha usab alang kanila nga manghawod sila diha sa espiritu sa pagkamaayo [paghatag nga walay pagpaabot ug balos] ingon nga ebidensiya sa ilang pagkamatinud-anon diha sa pagsunod

Aron sa pagdasig sa mga kaigsoonan nga taga-Corinto diha sa pagpadayag sa pagkamanggihatagon, si Pablo nagsulat kanila mahitungod sa ehemplo sa mga kaigsoonan sa Macedonia kinsa, bisan pa man sa ilang dakong kapubrehon, malipayon nga nitampo ug pundo nga makahatag ug benepisyo sa mga pubreng balaan didto sa Jerusalem. Ang susamang pananglitan sa ingon niana kadako nga kasingkasing nahisgotan sa atong Ginoo kinsa nakadayeg sa usa ka biyuda kinsa nihatag ug duha ka kuwartang diyot didto sa halaran. Mao ra kadto iyang kuwarta. (Lucas 21:2) Busa, kadtong mga dedikado

sa Kristohanong mga prinsipyo, ug isip usa ka pagpadayag sa pagkabalaan sa ilang kasingkasing.

Ang halapad nga leksyon nga angay masabtan sulod sa panahon sa nahaunang Iglesia maingon man sa pagkakaron mao ang katinuoran nga ang konsagrasyon wala lamang nagpasabot sa paghatag aron sa pagtabang sa uban sa ilang pang-adaw-adlaw nga panginahanglanon. Hinonaa, ang mga magtotoo nanaad nga ihatag ang ilang tanan sa Agalon. Ang labing maanindot nga gasa nga mamahimong ikahatag sa Langitnong Amahan aron sa pagpakita sa Iyang dakong gugma sa tawhanong pamilya gipadayag diha sa Iyang papadala sa Iyang bugtong Anak nga mamahimong Manunubos niini. - Juan 3:16,17

Samtang si Jesus nagbuhat sa iyang tahas atol sa iyang pagduaw dinhi sa yuta, atong nahibaw-an nga ang pagbuhat sa kabubut-on sa Dios nakapaluya ug nakapakapoy sa iyang lawas. Sa matag-adlaw, naglakaw siya sa abogon nga mga dalan nga nagasangyaw, nagatudlo ug nagapailob sa oposisyon sa mga makasasala. Usa sa mga aspeto sa pag-antus ni Jesus mao nga wala siyay permanenteng puluy-anan nga matawag nga iyang kaugalingon diin siya makapahulay, maskin tuod maabi-abihon siyang ginadawat sa nagkalain-laing pinuy-anan. - Mateo 8:19,20

Ang espiritu sa pag-alagad ug pagsakripisyo maoy magatukmod sa mga magtotoo sa pagtahan sa kinabuhi mismo, ilabi na sa pagmantala sa Maayong Balita mahitungod sa gingharian alang kanila kinsa adunay dalunggan nga andam mamati. Ang tumong gayod sa atong pagkaila sa mga bililhong mga saad nga anaa sa Kasulatan dili lamang ang paghatag kanato ug intelektuwal nga kahibalo mahitungod sa plano sa Dios, hinoon sa pagtabang kanato diha sa proseso sa kabag-ohan. Busa, pinaagi sa makabalaang impluwensiya sa Espiritu Santo, magatubo kita ngadto sa pagkasusama kang Cristo.

Ang pagkadili hakog diha kanato maoy makatukmod kanato sa kalihukan diha sa pag-alagad sa kawsa sa Agalon. Maningkamot unta kita sa pagtuman niini nga responsibilidad aron atong mapadayag ang atong gugma alang sa Dios, sa Iyang matarong nga mga prinsipyo, ug sa katapusan makaambit sa pagpasig-uli sa katawhan balik ngadto sa Langitnong Amahan, sanglit ang katawhan ihibalik man sa kahingpitan nga nawala didto sa Eden. Nga sa matag-adlaw magalimod kita sa atong mga kaugalingon ug magapas-an kita sa atong krus samtang nagasunod sa atong Agalon. - Lucas 9:23 ■